

Gangj daengz Raemxdiuqdat Vangzgojsu, gyoengqvunz doeg gvaq saw haenx, mbouj miz byawz mbouj rox. Diuz raemxdiuqdat neix baengh de raemx lai, caek sang okmingz lajbiengz. Gizhaenx ndaej louz gvaq yamqdin Ciz Yazgwz boux Mingzcawz lijhingzgyah neix, geij aen gingdaeuz raemxdiuqdat ndaw densi 《Sihyouzgi》, couh dwg youq gizde aeu ndaej. Bet nyied raemxfwn lai, dwg mwh ceiq ndei yawjngonz raemxdiuqdat, yienghneix, gou iu geij boux baengzyoux hai ci bae Gveicouh youz, bae yawjngonz Raemxdiuqdat Vangzgojsu.

Vangzgojsu diegde gvihaeuj Gveicouh Swngj Anhsun Si, dwg dieg Buyihcuz comzyouq ndeu. Gizde depgyawj Yinznanz caeuq Guengjsae, liz Gveiyangz Si miz 150 lai goengleix gyae. Ngoenzde lajbyonghngoenz 3 diemj lai cung, dou cix daengz diegde, daj gij ci baiz rim song mbiengj roen yawj ndaej rox, dieg Vangzgojsu gaenq miz haujlai bouxyouz gag hai ci daeuj

sanjvwnz

Yawjngonz Raemxdiuqdat Vangzgojsu



gizneix youz lo.

Gveicouh Swngj soqlaiz hawj gou yaenqsiengq dwg yiengh deihmauh Gahshwdwz ciemq bae dieg dingzlai, mboujgvaq deihsei q dieg Vangzgojsu Cin haemq bingz haemq gvangq, diuz Dahbwzsuijhoz raemx sawyauyau, heux gvaq henz cin numqnot lae coh dieg gingjih Vangzgojsu.

Dieg gingjih Vangzgojsu saedceih dwg dieg ngamzlueg doekgumz ndeu, song mbiengj bya sang dat lingq. Ngamq byaij haeuj ndaw gingjih bae, couh dingqnyi sing raemxdiuqdat yiengj “huhu”, lienzdaemh hai ci baenznanz, saedcaih miz di fwngz maz gen unq, hoeng, baez dingqnyi gij sing raemxdiuqdat neix, gou couh cingsaenz hwnjdaeuj. Gyoengq hekyouz haeujhaeuj okok, roenbya youh geb youh ngutngeux, dou cijndei menhmenh byaij, cibfaen siujsim.

Deihmauh Gahshwdwz geizheih ndeiyawj dangqmaz, gwnz bya ndoqndiundiu, nanz ndaej raen gofaex hung, hoeng, gumzlueg cix gofaex sanggywgywg, laepcupcup, miz mbangj gofaex lij cigciep dokmaj youq gwnz ndaekrin dem; daxbaenh youq rog lij dwg mbwn gvengq ndit haenq, seizneix haeuj ndaw ngamzlueg daeuj, roxnyinh mbwn bumz rumz liengz. Byaij dwk byaij dwk, sing raemxdiuqdat yied daeuj yied yiengj, mwh dou byaij daengz doekbyongh dieg haemq gvangq he, foedfwd yawjraen dieggyae yangq (benq) ‘baengzhau’ he raezrangrang venj roengz ngamzbya daeuj, mbouj yungh lai gangj, yangq ‘baengzhau’ neix couh dwg Raemxdiuqdat Vangzgojsu okmingz lo! Caezgya raen daengz raemxdiuqdat, byaij roen engq miz cingsaenz lo.

Heux bae vanq dauq, mbouj rox geijlai baez cix heux daengz lajrij, gizde fatyienh lad daizngonzraemx gaenq ndwn rim gyoengq hekyouz lo, doenghboux doq yawjngonz doq haenhcwgwcw mbouj dingz.

(caengz sat)



Gouj nyied ngoenz cib hauh
Ciet lauxsae guek raeuz
Daj laeb ciet geq daeuj
Haeuj ngeihcib gouj baez

Lauxsae guh son gvai
Hawj vunzlai rox laex
Miz daudwz guh daej
Lumj gofaex maj maengh

Vanzlij aeu son saw
Bouxlawz goj coengmingz
Dungxsaej rimmbingmbing
Saehnieb dingh hwngvuengh

Lij gej mbouj roxyiuq

Hagseng ndiu hwnj sang
Ciuhvunz byaij roen gvangq
Ndwn sang yawj ndaej gyae

Sinjoj youq lajmbanj
Lae lwedhanh bae rengz
Vih ok ndei hagseng
Gveng liux byongh ciuhvunz

Sae mbouj gouz baudap
Rap naek dawz gwnzmbaq
Vih gensez guekgya
Hawj “swva” daengz caeux

Lauxsae lumj diemj lab
Cingq hab rongh bouxwnq

Rongh swlgeij caemh mwn
Ndwn gyang vunz ronghsag

Vunz miz caiz lumj mboq
Docih boux vat mieng
Sae guhhong bingzciengz
Guh giengz saeh hungmbwk

Lauxsae geng bobaq
Ganq faex maj ndaej hung
Miz go’bek gocoengz
Saeu liengz hung ndaej maenh

Angqhoh ciet lauxsae
Daihgya caez ciengq go
Coenzcoenz danq guekcoj
Gizgiz goj hoenghhwd

Veiz Gozcingh naeuz: “Sou aeu ciuq saehsaed bae senhconz gij huq ndaw Laeuzhung sou, ndei cix gangj ndei, mbouj ndei cix gangj mbouj ndei. Miz di vunz mbouj nyienh cawx huq Guengjsae, cij aeu huq Sanghaij, gizsaed Sanghaij caemh miz huq mbouj ndei, Guengjsae caemh miz huq ndei.”

Miz vunz cabbak naeuz: “Miz boux ganbu bae Baekging cawx aen siengnaeng, dauqma le yawj, aende yienzlaiz dwg Vuzcouh Guengjsae guh.”

Veiz Gozcingh naeuz: “Dwg vei, doxgaiq Guengjsae hix miz gaiq ndei. Gij huq raeuz ngamq gag guh haenx, haidaeuz cizlieng aiq yaez di, hoeng aeu dingjrenz de, gyaehzoh de, bang de daezsang cizlieng, gvaqlaeng de cix rox bienq ndei. Youq aen fuengmienh neix, gunghsangh aeu doxbang, gaej

doxdik. Daengzcog doxgaiq ngoenzyungh raeuz ndaej gag baengh bonjfaenh muenxcuk le, caemh ciuqyiengh aeu daj diegrog buenq huq, gij huq raeuz caemh aeu gai daengz swngjrog caeuq guekrog bae.”

Gvangh Yenz caeuq gij vunzgaemhong Laeuzhung cungj byaujsi, gvaqlaeng yaek lai buenq gij huq Guengjsae gag guh haenx,

dingjrenz ginghgunghyez Guengjsae.

Veiz Gozcingh lij cienmonz cunz le boux vunzhong maenhndei honggaicawx guh hong youq Laeuzhung Bakuq haenx Fu Canvaz.

Fu Canvaz dwg boux cujcangj cujsaeq doxgaiq ngoenzyungh laeuzhung ndeu, daengx cuj 13 vunz youq de dazyinx lajde, hong yied guh yied sijsaeq, yied guh yied ndei.

Veiz Gozcingh Sangcieng Cawjguenj Guengjsae Ngeihcib Bi

韦国清上将主政广西二十年

□ Hoz Saubangj sij Cinz Siengzcouh Liuz Gingliuj Cinz Siengzgen hoiz

Gyoengqde cingzndat fuzvu hawj vunzlai, ndaej daengz hekcawx haenhndei. Miz boux hekcawx ndeu geiq daeuj hot sei haenhndei ndeu: “Laeuzhung Bakuq dujva maez, Cujsaeq Canvaz bouxboux haenh; Yietnaiq ngoenzde lij hwnjban, Haemh soengq gva lengj haeuj ranz dou.”

(caengz sat)